

ԶՂՁՈՒՄՆ

Մեղա՛յ ամենասուրբ Երրորդութեանն՝ Հօր եւ Որդւոյ եւ Հոգւոյն Սրբոյ։
Մեղուցեա՛լ եմ Աստուծոյ։ Խոստովանիմ առաջի Աստուծոյ եւ սրբուհւոյ
Աստուածածնին եւ առաջի քո, հա՛յր սուրբ, զամենայն մեղս, զոր գործեալ եմ։ Քանզի
մեղայ խորհրդով, բանիւ եւ գործով, կամայ եւ ակամայ, գիտութեամբ եւ
անգիտութեամբ, մեղա՛յ Աստուծոյ։

Մեղա՛յ հոգւովս եւ զօրութեամբ սորա, մտօքս եւ շարժմամբ սորա, մարմնովս եւ
զգայութեամբ սորա։ Մեղայ զօրութեամբ հոգւոյս՝ խորամանկութեամբ,
անզգամութեամբ, յանդգնութեամբ եւ երկչոտութեամբ, շռայլութեամբ եւ
ժխտութեամբ, գեղխութեամբ եւ անիրաւութեամբ, չարահաւանութեամբ,
յուսահատութեամբ եւ թերամտութեամբ։ մեղա՛յ Աստուծոյ։

Մեղա՛յ չար խորհրդով մտացս՝ նենգութեամբ, ատելութեամբ, խեթիւ, մախանօք,
յաչաղանօք, թուլութեամբ, պոռնկական խորհրդով, արուական, իգական, անասնական,
գրաստական, գազանական, ի գիշերի եւ ի տուրնջեան։ Երազական գիշութեամբ եւ
անըջական գարշ աղտեղութեամբ։ մեղա՛յ Աստուծոյ։

Մեղա՛յ ցանկութեամբ մարմնոյս՝ հեշտութեամբ, պղերգութեամբ, յօրանջմամբ քնոյ,
շարժութեամբ մարմնոյս եւ զազրագործութեամբ ի պէս-պէս ախտս։ հեշտալրութեամբ
լսելեացս, արատութեամբ աչացս, ցանկութեամբ սրտիս, իգութեամբ ռնգացս,
պաղչոտութեամբ բերանոյս, անժուժկալութեամբ, շուայտութեամբ եւ արբեցութեամբ։
մեղա՛յ Աստուծոյ։

Մեղա՛յ չարաբանութեամբ լեզուիս՝ ստախօսութեամբ, սուտ երդմամբ,
երդմնազանցութեամբ, հակառակութեամբ, վիճաբանութեամբ, բանսարկութեամբ,
չոգմոգութեամբ, քսու, դատարկաբանութեամբ եւ ծաղու, զրախօսութեամբ,
հերձախօսութեամբ եւ անիծաբանութեամբ, տրտնջելով, դժգոհելով, բամբասելով եւ
հայհոյելով։ մեղա՛յ Աստուծոյ։

Մեղա՛յ գողութեամբ ձեռացս՝ ագահելով, զրկելով, հարկանելով, սպանանելով եւ ընդ
քարչս ածելով, մեղա՛յ Աստուծոյ։

Մեղա՛յ ամենայն յօդուածովք շինուածոյս եւ ամենայն անդամօք մարմնոյս։ Հնգեակ
զգայարանօքս եւ վեցեկի շարժմամբս։ վերամբարձ ոտնահարութեամբ եւ վայրաքարչ
մեղկութեամբ, յաջ եւ յահեակ խոտորելով, զառաջնոցն մեղանչելով եւ վերջնոցն չար
նշաւակ գոլով, մեղայ Աստուծոյ։

Այլ եւ մեղա՛յ եօթնիցս յանցանօք մահացու մեղօք՝ հպարտութեամբ եւ մասամբք
նորին, նախանձու եւ մասամբք նորին, բարկութեամբ եւ մասամբք նորին,
ծուլութեամբ եւ մասամբք նորին, ագահութեամբ եւ մասամբք նորին,
որկրամոլութեամբ եւ մասամբք նորին, բղջախոհութեամբ եւ մասամբք նորին։ մեղա՛յ
Աստուծոյ։

Այլ եւ մեղա՛յ ամենայն պատուիրանացն Աստուծոյ՝ յանձնառելեացն եւ
հրաժարելեացն։ զի ոչ զյանձնառականսն կատարեցի եւ ոչ ի հրաժարելեացն հեռացայ,
զօրէնս առի եւ յօրինացն հեղգացայ, ի կարգս քրիստոնէութեան հրաւիրեցայ եւ
գործովս անարժան գտայ, գիտելով զչարն՝ կամաւ կորացայ եւ ի բարեաց գործոց ես

ինձէն հեռացայ. վա՛յ ինձ, վա՛յ ինձ, վա՛յ ինձ: Զո՞րն ասեմ, կամ զո՞րն խոստովանիմ, զի անթիւ են յանցանք իմ, անասելի են անօրէնութիւնք իմ, աններելի են ցաւք իմ, եւ անբժշկելի են վէրք իմ. մեղա՛յ Աստուծոյ:

Հա՛յր սուրբ, զքեզ ունիմ միջնորդ հաշտութեան եւ բարեխօս առ Միածին Որդին Աստուծոյ, զի իշխանութեամբդ, որ տուեալ է քեզ, արձակեսցես զիս ի կապից մեղաց իմոց, աղաչե՛մ զքեզ:

ԱՐՁԱԿՈՒՄՆ

Ողորմեսցի քեզ մարդասէրն Աստուած եւ թողութիւն շնորհեսցէ ամենայն յանցանաց քոց՝ խոստովանացելոցն եւ մոռացելոցն: Եւ ես կարգաւս քահանայական իշխանութեան եւ հրամանաւն աստուածային, թէ՛ Զոր արձակիցէք յերկրի, եղիցի արձակեալ յերկինս, նովին բանիւն արձակեմ զքեզ յամենայն մասնակցութենէ մեղաց քոց՝ ի խորհրդոց, ի բանից եւ ի գործոց յանուն Հօր եւ Որդւոյ եւ Հոգւոյն Սրբոյ: Եւ դարձեալ տամ զքեզ ի խորհուրդս սուրբ եկեղեցւոյ, զի զոր ինչ գործիցես բարիս, եղիցի քեզ ի բարեգործութիւն եւ ի փառս հանդերձեալ կենացն. ամէն:

Տ. Սերոբ Քահանայ Ազարեան